



नाम संगीतिज्ञाने सप्तत्रिंशत्
सम्बोधिपाक्षिक धर्म



दिवंगत जोगमाया शाक्य

जन्म :- ने.सं. १०४९ फागुन शुक्लपक्ष तृतीया

मृत्यु :- ने.सं. ११३० सिल्लागा अष्टमी

२०६६ साल माघ २३ गते शनिवार

॥ नमो रत्न त्रयाय ॥

दुर्गति परिशोधन धारणी

ओं नमो भगवते सर्वदुर्गति परिशोधन राजाय तथागता
याऽर्हते सम्यक्सम्बुद्धाय ॥ तद्यथा ॥ ओं शोधने शोधने
विशोधने विशोधने सर्वपाप विशोधने सर्वापाय विशोधने शुद्धे
विशुद्धे सर्वपाप विशुद्धे सर्वकर्मावरण विशोधने स्वाहा ।

थुगु दुर्गति धारणी पाठ यानागुया प्रभावं दिवंगत
जुया बिज्याम्ह **जोगमाया शाक्य** प्रमुख नापं दिवंगत
जूपिं सकल प्राणीपिं सुखावती भुवनस बास लायेमा धैगु
कामना यानागु जुल ।

अनुवादक :

कविराज पं. सद्धर्मराज वज्राचार्य "शास्त्री"

अथबाहा: (नकबहिल), यल ।

फोन नं. ५५-३४७३१

प्रकाशक :

भाजु इन्द्रमुनि शाक्य, मय्जु रत्नशोभा शाक्य

पद्मावती महाविहार, न:बाहा:, यल ।

९८४१२६१३०७ / ५५२६२४४

न्हापांगु संस्करण : २००० प्रति

प्रकाशन दिं

ने.सं. ११३० गुंलागा: द्वितीया (मतया:)

वि.सं. २०६७ भाद्र १० गते बिहीवार

धर्मदान

थाक् :

बागमती छापाखाना

गाबाहा:, वनबाहा:, यल ।

फोन ल्या: ५५३३८४७

प्रकाशकया धापु

भगवान् शाक्यमुनि बुद्धं धान्यकटक महाचैत्य पर्वतय् स्वक्वःगु पटक धर्मचक्र प्रवर्तनया सिलसिलाय् वज्रपाणी व मेमेपिं बोधिसत्वपिनिगु अध्वेषणाकथं आर्य नामसंगीति नं देशना याना बिज्यागु जुल धैगु खं भीसं थी थी सफूस ब्वने दु । थुगु हे कथं नेपाल मण्डल (काठमाडौं उपत्यका) या बहाः बही, चुक, ननीं न्हि न्हि धैथें सुथ न्हापा नसंचा इलय् शान्तगु वातावरणय् मनय् याउँसे सिचुसे च्वंक नामसंगीति, नन् ब्वना हइगु भी सकसिन अनुभव याना वयाच्चंगु खः । थ्वहे क्रमय न्हापानिसें पद्मावती महाविहार नःबाहाःस थौं तक निरन्तर रूपं नसंचा इलय् नामसंगीति पाठ याना वयाच्चंगु दु । नःबाहाः त्वाःया हनेवहपिं दाजुकिजा तताकैहेपिं मिले जुया नेपाल परम्परागत बौद्धधर्म सघ अथःबाहाः (नकबही) पाखें न्ह्याका वयाच्चंगु नामसंगीति पर्व (नगर परिक्रमा ज्याभवः) वंगु २०६६ चैत्र १७ गते कुन्हु आनन्द महिला समूह इखाछे त्वाःया ग्वसालय् क्वचागु न्याक्वःगु नामसंगीति पर्व पाखे खुक्वःगु पाःब्वः कया हया पद्मावती महाविहार, आर्य नामसंगीति पुचः, नःबहाल टोल सुधार समितियागु ग्वसालय् हरेक महिनाया पुन्हि पुन्हि पतिक थी थी त्वाःया नामसंगीति पुचः खलः पाखें नामसंगीति पाठ व हनेवहपिं बौद्ध विद्वानजु पाखें नामसंगीतिया महत्त्वबारे प्रवचन ज्याभवःकथं वगु २०६७ साल असार १२ गते शनिवार (असार पुन्हि) कुन्हु हनेवहम्ह बौद्ध विद्वान कविराज पं. श्री सद्धर्मराज वज्राचार्य "शास्त्री"जु पाखें प्रवचन बिया बिज्यागु जुल । अतिकं बाँलागु महत्त्वपूर्णगु प्रवचन न्यने दया लसता प्वंका च्वना । वसपोल नापं सल्लाह याना थुगु "नामसंगीतिजाने सप्तत्रिंशत सम्बोधिपाक्षिक धर्म" संक्षिप्त सफू पिकाय् दुगुलिं हनेवहम्ह बौद्ध विद्वान कविराज पं. सद्धर्मराज वज्राचार्य, ग्वसाखलः पद्मावती आर्य नामसंगीति खलः नबहाल टोल सुधार समिति नाप प्रत्यक्ष अप्रत्यक्ष ग्वहाली याना बिज्यापिनिगु दुनुगलनिसें कृतज्ञ गुण लुमंकुसे सुभाय देछाया च्वना ।

- इन्द्रमुनि शाक्य
पद्मावती महाविहार
नःबाहाः, २० वडा, यल ।

अनुवादकया मन्तव्य

थ्व नामसंगीतिज्ञाने सप्तत्रिंशत सम्बोधिपाक्षिक धर्म धङ्गु अद्वय परमार्थ नामसंगीतिज्ञाने व नामसंगीति अमृतकर्णिकोद्योत तथा मन्त्रार्थ अवलोकिनी नामसंगीतिज्ञाने १० अध्याये वङ्गु छङ्गु एकत्र जूगु ज्ञान खः ।

पचविंशतिका प्रज्ञापारमिता सूत्रे व अष्टसाहसिका प्रज्ञापारमिता सूत्रे नं एकत्र याना तःगु खनेदु । अपो याना मुख्यगु ज्ञान नामसंगीतियागु ज्ञाने सप्तत्रिंशत सम्बोधिपाक्षिक धर्म घ्यातःगु दु । अथे हे स्वयम्भु पुराणे नं नामसंगीतियागु द्वादशाक्षर कयातःगु खने दु ।

अथेहे डोम्बी हेरुक नामसंगीति वृत्ति देवता योगे सप्तत्रिंशत सम्बोधिपाक्षिक धर्म क्यनातःगु नं खने दु । अपो याना नामसंगीतिज्ञाने सप्तत्रिंशत सम्बोधिपाक्षिक धर्म १० अध्याये भावार्थ क्यनातःगु जुयाच्चन ।

थुगु कथं मञ्जुश्री बोधिसत्त्व आपालं टीका नामसंगीतिया गम्भीरगु अर्थ प्रकाश याना वन । नामसंगीतिया प्राचीनता व परम्परा यागु समयले जुयावंपिं आचार्यपिसं भावार्थ यानातःगु आतक नं खने दु । थ्व संस्कृत गद्य पद्य जक जुयाच्चन । जिं थ्व नामसंगीतिया ज्ञाने सप्तत्रिंशत सम्बोधिपाक्षिक धर्म यागु अनुवाद यानागु जुल ।

न्हापा आचार्यपिसं दयेका च्वया थकूगु उल्लेख यानातःगु सफुत फुक भर्त्सि ब्वनेत प्राप्त याये मफूगु भीगु दुर्भाग्य खः । थ्व नामसंगीतिया पदार्थ जक याना पिहां वङ्गु मखु । गुरु परम्परा तथा टीकाकार तय्गु व्याख्याया आधारं जक व्यक्त जुड फड ।

थथेहे महायानया मूल रहस्य वज्रयोग दुने लाना च्वंगु दु । वज्रयोगं याना अद्वयज्ञान लाभ जुड । अलेतिनि मञ्जुश्री ज्ञान सत्त्वयात म्हसिइके फडगु जुल । थ्वहे ज्ञान “वज्रसूर्य महालोको वज्रेन्दु विमलप्रभ” निसें कया “विशुद्ध परमाक्षर” तकया भित्रे वज्रयोग यागु फुक रहस्य वर्णन यानातःगु दु धका विमलप्रभासूत्रे च्वयातःगु दु । विमलप्रभा सूत्र धङ्गु नामसंगीतियागु टीका भावार्थ याना क्यनातःगु जुयाच्चन । तर थन नामसंगीतिया पद यागु जक अर्थ याना नामसंगीति वज्रयोग यागु ज्ञान थुइका कायेगु असम्भव जुल । नामसंगीति वज्रयोग यागु ज्ञान आपालं कनातःगु दु ।

थ्व नामसंगीतिज्ञाने सप्तत्रिंशत सम्बोधिपाक्षिक धर्म दुगु कारणं आदि बुद्ध नामसंगीति भगवान् बुद्ध पलेस्वाँया द्योने नामसंगीति पुस्तक धारण यानाच्चंगु जुल । थ्व मुख्यगु ज्ञान संयुक्त नामसंगीति सकलयात दर्शन बियाच्चंगु जुल ।

थ्व नामसंगीतिज्ञाने सप्तत्रिंशत सम्बोधिपाक्षिक धर्म धङ्गु सफू पद्मावती महाविहार, नःवहाल निवासी भाजु इन्द्रमुनि शाक्य व मय्जु रत्नशोभा शाक्य पाछे प्रकाशित याना बिज्यागुलिं आपालं सुभाय् दु ।

– सद्धमराज वज्राचार्य

नामसंगीति स्तोत्र

श्री आर्य नामसंगीति महा मंजुश्रियं वरम् ।

क्लेश दुखापहं सर्वं सर्वदा प्रणमाम्यहम् ॥

नामसंगीति ज्ञाने सप्तत्रिंशत सम्बोधिपाक्षिक धर्म

नामसंगीतिज्ञाने सुविशुद्ध धर्मधातु ज्ञानया सप्तत्रिंशत
सम्बोधिपाक्षिक धर्मया महत्त्व थथे कनातःगु दु ।

महा वैरोचनो बुद्धो महामौनि महामुनिः ।

महा मन्त्र नयोद्भूतो महा मन्त्र नयात्मकः ॥

थ्व नामसंगीति मुख्यम्ह महा वैरोचन बुद्ध महामौनि महामुनि
जुया महामन्त्रनय उत्पन्न जूगु महामन्त्रनयात्मक अर्थात् महामन्त्रनये ॐ
वज्र स्वभावात्मकोहं धइगु महामन्त्रनये प्रतिस्थित जुयाबिज्याम्ह ॐ आः
हुँ वज्र धरात्मा जुया समन्तप्रभा मण्डल भूमि बोधिमण्डपे च्वना वज्रोपम
समाधियोगं ॐ वज्र स्वभावात्मकोहं धइगु महामन्त्रनयद्वारा जिं बुद्धपद
लाभ यानागु खः धका स्वीन्हय्गू सम्बोधिपाक्षिक धर्म प्रकाश जूगु देवता
योग कनातःगु दु । थ्व वज्रयाने वइगु नामसंगीति गुह्यज्ञान कनातःगु दु ।
सप्तत्रिंशत बोधिपाक्षिक धर्म बाह्ये थथे कनातःगु जुयाच्चन ।

बुद्धोपदेश नामसंगीतिज्ञानकथं थ्व संसारे सम्पूर्ण प्राणीपिन्त जरा
मरण चक्र यागु दुःखं मुक्त याना निर्वाणया अकनिष्ठा भुवने सुखालये
प्रतिस्थित यायेगु नामसंगीतिज्ञान महायानया ज्ञान श्री शाक्यमुनि भगवान्
बुद्ध उपदेश बियाबिज्यागु थ्व नामसंगीतिज्ञाने सप्तत्रिंशत सम्बोधिपाक्षिक
धर्म कनातःगु दु ।

सत्ययुगे थ्व नेपाल मण्डले सुदूर्जया बोधिसत्त्व भूमि नेपाल मण्डल
स्थापना जूबले नामसंगीतिज्ञान विपश्वी बुद्ध, शिखिवि बुद्ध, ऋकुछन्द बुद्ध

आदि बुद्धापिसं कनाबिज्यागुलिं भी सकलयात थ्व नामसंगीतिज्ञाने सप्तत्रिंशत सम्बोधिपाक्षिकज्ञानया धर्म लाभ जुया वःगु खः ।

सम्यक्दृष्टि बुद्धधर्म पालन यायेगु चर्य मार्ग सत्ययागु सदाचार पालन याइम्ह व्यक्ति आदर्शवान जुइ । थ्वहे सिलसिलाय् बुद्धधर्मया महायान यागु सिद्धान्त प्रतिपादन यानातःगु थ्व नामसंगीतिज्ञान मानव कल्याणया लागि सर्वोत्कृष्ट लक्षणयुक्त बोधिज्ञान समावेश यानातःगु दु । सम्पूर्ण प्राणीया समानता जुइक सकल प्राणीपिन्त कल्याण जुइगु धर्म समन्वय यागु प्रगतिशील विचारधारा युक्त वज्रयान सम्प्रदाय यागु नं नामसंगीतिज्ञाने सप्तत्रिंशत सम्बोधिपाक्षिक धर्म नं आधारित जुयाच्चंगु दु ।

थ्व विहार आगम गुम्बाय् च्वंगु वज्रयान यागु मण्डले व महायान यागु विहारय् संचालित जुयाच्चंगु व्रत उपवास तथा दीक्षा ग्रहण यायेगु अनिवार्य जुयाच्चंगु निर्देश मुताविक शून्यताज्ञान एवं नामसंगीतिज्ञान यागु आधार कया बोधिसत्त्व यागु ज्ञाने सप्तत्रिंशत सम्बोधिपाक्षिक धर्म लाभ यायेगु बुद्धोपदेश कनातःगु दु ।

नामसंगीतिज्ञाने शून्यताज्ञान कनातःगुकथं परिकल्पित स्वभाव परतन्त्र स्वभाव तथा परिनिस्पन्न स्वभाव व्याख्या याना तःगुलिं थ्व नामसंगीतिज्ञाने प्यंगू स्मृत्युपस्थानं निसें आर्यअष्टांगमार्ग तकया सप्तत्रिंशत सम्बोधिपाक्षिक धर्म यागु लक्षण कायसम्बर यागु ज्ञानं निर्वाण लाभ यायेगु बोधिज्ञान सिइका बुद्धधर्मया महायान चर्य पालन यायेमाःगु जुयाच्चन ।

थुगु विषये नामसंगीतिज्ञाने महायान यागु मार्गसत्य प्यंगू स्मृत्युपस्थानं निसें आर्यअष्टांगमार्ग तकयागु बुद्धोपदेश नामसंगीतिज्ञाने सप्तत्रिंशत सम्बोधिपाक्षिक धर्म व्याख्यान याये त्यनागु खः ।

नामसंगीतिज्ञाने सप्तत्रिंशत सम्बोधिपाक्षिक धर्मया थुगुकथं पाठ वडगु खः ।

"येतु स्मृत्युपस्थानं आरभ्य बुद्धस्याकार पश्चिमा शिष्यानां बोधिसत्त्वानां बुद्धानां यथाक्रमं ज्ञानं अनुत्तरायां सम्यक्सम्बोधौ" ।

अर्थात् प्यंगू स्मृत्युपस्थानयागु ज्ञानं निसें बुद्धत्व लाभ यायेगु आकारे बुद्ध जुइपिं बुद्धया शिष्य बोधिसत्वपिंगु लागि यथाक्रमं लिपा अनुत्तर सम्यक्सम्बोधिज्ञान लाभ यायेगु नामसंगीतिज्ञाने प्यंगू स्मृत्युपस्थान निसें थुकथं कनातःगु दु ।

चत्वारः स्मृत्युपस्थानाश्चत्वारः सम्प्रहाणकाः ।

चत्वारः ऋद्धिपादाश्च पञ्चैन्द्रियास्तथैवच ॥

तथा पञ्चबलाश्चापि बोध्यंगाः सप्तवै पुनः ।

आर्याष्टांगाश्चवै मार्गाः एताः सम्बोधिपाक्षिकाः ॥

अर्थात् नामसंगीतिज्ञानकथं सप्तत्रिंशत सम्बोधिपाक्षिक धर्म थुकथं कनातःगु दु ।

प्यंगू स्मृत्युपस्थान । प्यंगू सम्प्रहाण । प्यंगू ऋद्धिपाद । न्यागू इन्द्रिय । न्यागू तथागत बल । न्हयगू सम्बोध्यंग । च्यागू आर्यअष्टांग मार्ग । थुलि स्वीन्हयगू सप्तत्रिंशत सम्बोधिपाक्षिक धर्म नामसंगीतिज्ञाने कनातःगु दु ।

न्हापां वइगु ४ प्यंगू स्मृत्युपस्थानया अर्थ थथे कनातःगु दु । प्यंगू स्मृत्युपस्थान धायेबले कायानुस्मृत्युपस्थान, वेदनानुस्मृत्युपस्थान, चित्तानुस्मृत्युपस्थान, धर्मानुस्मृत्युपस्थान थुलि प्यंगू यागु थुकथं वर्णन बिया तःगु दु ।

कायानुस्मृत्युपस्थाने अध्यात्मकाय, वहिर्धाकाय निगू प्रकारया वर्णन बियातःगु दु ।

अध्यात्मकाय — शरीरया दुनेयागु ज्ञानयात कायानुदर्शी धाइगु खः । थ्व थःगु शरीरय् बाँलाक विचार याना स्वयेगु खः । शरीर धइगु थुजागु थुजागु धका सिइका काय अनुस्मृति बारम्बार लुमंका च्वनेगु खः । गुकथं धाःसा— थ्व अध्यात्मकायया शरीरय् मिखा, न्हाय्पें, न्हाय्, म्ये, छयंगुया शरीर व मन दु । थ्व शरीरया दुने च्वंगु इन्द्रिययात अध्यात्मकाय धाइगु खः ।

वहिर्धाकाय— थ्व शरीरया पिने रूप, शब्द, गन्ध, रस, स्पर्श व

प्रस्तव्य दु । थुलि खुगू शरीरया पिनेयागु इन्द्रिययात वहिर्धाकाय धाइगु खः । थुजागु अध्यात्मकाय व वहिर्धाकायया दुने पिने यागु निगू इन्द्रिय संयोग जुयाच्चंगु दु ।

रूप- मिखां बाँला, बाँमला धका स्वइगु । शब्द- न्हायपं नं शब्द वागु न्यना ग्या, मग्या धाइगु । मखुगु खँ न्यना व थुजाम्ह अजाम्ह धका कल्पना याना च्वनीगु । गन्ध- न्हाय् नं खुगु प्रकारया रसे सुगन्ध दुर्गन्ध सिइका काइगु । रस- म्ये इन्द्रियं खुता प्रकारया रस सागु, मसागु, फाकुगु, खायुगु, पाउंगु, पालुगु, चाकुगु, चिसवावःगु आदि सिइका काइगु । स्पर्श- क्वागु, ख्वाउँगु थिया सिइका काइगु । प्रस्तव्य धइगु मनं मभिंगु, थ्व भिंगु, थ्व मभिंगु, शुभ, अशुभ, सत्य, असत्य, नित्य, अनित्ययागु ज्ञान विचार याना च्वनीगु जुल ।

थ्व संसारय् प्राणीपिनि अध्यात्मकाय व वहिर्धाकायया दुने पिने यागु शरीरय् अज्ञानं याना आकाशयात सुपायनं त्वपुइगु थ्ये । चन्द्र सूर्ययात राहुँ ग्रस्त याइगु थ्ये भिंगु दृष्टियात मभिंगु दृष्टिं त्वपुगु थ्ये, सत्ययात असत्यं त्वपुगुथ्ये जुयाच्चंगु थुजागु अजागु धइगु अज्ञानं छुं नं मसिया च्वंगु अज्ञानं याना मिखां मखना अनेक माया अभिध्या धइगु लोभ कया लालच जुइगुलि विरोध व चुकुलि याइगु । दौर्मनस्य धइगु मती अनेक चिन्तना याना शोक मानसिक पीडा जुइका दुःखमनं कष्ट मनं कष्ट भोग याना जुया च्वन ।

थुजागु अध्यात्मकाय व वहिर्धाकाय धइगु शरीरय् खालि माया जक जाया च्वंगु खः । लखे विन्दु लः प्वप्वचा उठे जुया हानं तज्याना लखे नातुं मिले जुयावना च्वंगु व न्हाय्कने दुने थःगु किच खंगु ल्हातं ज्वने मज्युगु थ्ये च्वंगु खः । नदी खुसि न्त्यागु लः लिहां मवोगु थ्ये थ्व शरीर विते जुया मृत्यु जुइबले लिहाँ वइ मखुगु जुयाच्चन ।

थुजागु प्रकारं थ्व संसारय् जन्म मरण जक जुयाच्चने माःगु शरीर विचार याना च्वनेगु यात कायानुस्मृत्युपस्थान धाइगु खः । धका नामसंगीतिज्ञाने कनातःगु दु ।

वेदनानुस्मृत्युपस्थान धइगु ज्ञान गजागु धाःसा सुख वेदना दुःखवेदना धइगु दुःख अनुभव जुइगु, सुख अनुभव जुइगु अर्थात् सुख जूगु लुमना वइगु । सुख धका याउँका च्वनीगु । दुःखनं मस्यू । सुखनं मस्यू जुइक भ्रान्ति जुइका च्वनीगुयात दुःखानुवेदना, सुखानुवेदना । अदुःखानुवेदना, असुखानुवेदना धाइगु खः ।

वेदनाकथं - हानं वेदना धइगु गजागु, छु जूगु यात वेदना धाइगु खः । थ्व विषयय् निगू प्रकार वेदना दु । अध्यात्म वेदना व बहिर्धा वेदना ।

भीसं अध्यात्म वेदना धइगु सिइके माल । अध्यात्म वेदना धइगु सा मसा, चाकु, माकु, पाउँ, पालु इत्यादि यो मयो धइगु यात अध्यात्म वेदना धाइगु खः ।

बहिर्धा वेदना धइगु पिने क्वागु, ख्वाउँगु, नायुगु, छागु, क्यातुगु, बाँलागु यो, बाँमलागु मयो, प्रिय, अप्रिय धाइगु यात बहिर्धा वेदना धाइगु खः । भीत थजागु वेदना वया च्वनीगु दु ।

हानं थजागु नितां मिले जूगु धका मस्यूगु यात असुख वेदना अदुःख वेदना धाइगु खः । थुजागु यात वेदनानुस्मृत्युपस्थान धाइगु खः । थुजागु ज्ञान सिइकेगु यात नामसंगीतिज्ञाने वेदना तथताज्ञान धाइगु कनातःगु दु ।

चित्तानुस्मृत्युपस्थान- चित्तयागु स्वभाव राग द्वेष मोह जुइगु चित्त मदयेकेगु, समाधान जू मजू विचार याना च्वनेगु खः ।

अध्यात्म व बहिर्धा दुने पिने यागु बाँलाक विचार याना स्वया चित्तयात भिंगुस्थाने तया भिंगु ज्ञानं जक लुमंका नामसंगीति उपासना याना च्वनेगु खः ।

अजागु अध्यात्म व बहिर्धा दुने पिने यागु चित्तं रागयात नियन्त्रण यायेगु अर्थात् चित्तयात थःगु वशे तयेगु व रागयात विगत राग यायेगु रागयागु वशे मच्चनेगु, द्वेषयागु वशे मच्चनेगु, मोहयागु वशे मच्चनेगु थःगु चित्तयागु खेल खः ।

चित्तं राग मकायेगु, मोहे भुले मजुइगु, सुयातनं द्वेष मयायेगु ।
बाँलागु स्वभाव पिकया शान्त जुया च्वनेगु । स्थिर चित्त यायेगु यात
नामसंगीतिज्ञाने चित्तानुस्मृत्युपस्थान धाइगु खः । मेगु थुकीया ज्ञान आपालं
दनि धयातःगु दु ।

धर्मानुस्मृत्युपस्थान— धर्म, अधर्म, कुशल, अकुशल बाँलाक विचार
याना लुमंका अधर्म व अकुशल याकें लिचिला च्वनेगु खः । गुकथं
लिचिला च्वनेगु धाःसा अधर्म यागु चिं मछा मजूगु ढंगं गफ याइगु
अन्ही स्वभाव त्वतेगु । संभिन्न प्रलाप धइगु । ल्वापु जुइगु खँ ल्हाना
च्वंगु यात पना बियेगु । अभिध्या-द्रोह याइगु यात पना बियेगु ।
उपनाह-दागा तया जुइगु यात पना बियेगु । प्रदास-द्रोह मयायेगु । भिंगु
ज्या लुमंका भिंगु ज्या कया लजगा याना च्वनेगु यात नामसंगीतिज्ञाने
धर्मानुस्मृत्युपस्थान धाइगु खः ।

अनलि नामसंगीतिज्ञाने प्यंगू प्रहाण वइगु दु ।

१) अनुत्पन्न अकुशल सम्प्रहाण ।

२) उत्पन्न अकुशल सम्प्रहाण ।

३) उत्पन्न कुशल समुत्पादन ।

४) उत्पन्न कुशल धर्म संरक्षण ।

१) अनुत्पन्न अकुशल सम्प्रहाण धइगु आर्य उच्च कुल्य जन्म
जुया पंचामृत प्रयोग याना उत्तम धर्म साधना यायेगु । अकुशल उत्पत्ति
मजूगु, उत्पत्ति जुइमलानिगु । प्रकाश मजूनिगु । प्रकाश जुइ मफुनिगु ।
प्रकाश जुइ मलानिगु । अमंगल जुइगु । असत बाँमलागु कर्मयागु बीज
चुलि थाहाँ वइगु यात मदयेका बीगु । अजागु अकुशल मभिं जुइत्यंगु यात
नामसंगीतिज्ञानं नियन्त्रण यायेगु यात अनुत्पाद सम्प्रहाण व अनुत्पन्न
अकुशल सम्प्रहाण धाइगु खः ।

२) उत्पन्न अकुशल सम्प्रहाण — धइगु भिंगु धर्म साधना यायेगु
इच्छा दुपिसं त्याग यायेमाःगु अकुशल मभिंगु उत्पत्ति जूगु, मभिं जुइत्यंगु
अयोग्य जूगु अशुभ अकुशल कर्मयागु बीज चुलिह्वगु सहित यात थःम्हं

वीर्य पराक्रम पिकया साहसपूर्वकं अकुशल कर्म मय्येका वीरु । अकुशल कर्म याकें तापाक च्वनेगु, सदां भिंगु ज्या क्यना जुइगु यात उत्पन्न अकुशल सम्प्रहाण धाइगु खः ।

३) उत्पन्न कुशल समुत्पादन- भिंगु उत्तम धर्म यायेगु इच्छा दुपिसं अकुशल कर्म उत्पन्न मजूनिगु, जुइमलानिगु, उत्पन्न जुइ मफुनिगु भिंगु जुयाच्चंगु । भिंगु धर्मयागु बीज ह्वला पिना बुइका भिंगु धर्मया पुसा पिना बीज थाहाँ वःगु चुलि दं कचा इत्यादि फल थःगु वीर्य उत्साहपूर्वकं बराबर प्रकाश यायेगु कुतः याना प्रकाश व प्रचार यायेगु । असत्य जूगु फुक त्वता वीरु । भिंगु ज्ञान गुलि दु व फुक ज्ञान धारण यायेगु यात नामसंगीतिज्ञाने उत्पन्न कुशल समुत्पादन धाइगु खः ।

४) उत्पन्न कुशल धर्म संरक्षण- उत्पन्न जुइ धुंकूगु धर्म मतयागु जःथ्ये प्रकाश जुयाच्चंगु कुशल धर्म स्थितियागु भाव जक हे गुबलेन मस्यंक, मफुइक, अथेहे त्व मफीक थःगु वीर्य पराक्रमं उत्साह पिकया भिंगु महायान जूगु, धर्म यात रक्षा याना च्वनेगु यात नामसंगीतिज्ञाने उत्पन्न कुशल धर्म संरक्षण धाइगु खः । थुजागु प्यंगू सम्प्रहाण धर्म यागु ज्ञान सिइका च्वनेमा धका भगवान बुद्ध कना विज्यात ।

अनंलि समाधि परिकर्म मार्ग वइगु दु । समाधि परिकर्म मार्ग धइगु प्यंगू ऋद्धिपाद यात धाइगु खः । समाधि परिकर्म मार्गे प्यंगू ऋद्धिपाद नामसंगीतिज्ञाने थुकथं गाथा कनातःगु दु ।

छन्द समाधि ऋद्धिं च वीर्य ऋद्धि तथैव च ।

चित्त समाधि ऋद्धिं च विमर्श ऋद्धि मेव च ॥

भावार्थकथं छन्द समाधि ऋद्धिपाद । वीर्य समाधि ऋद्धिपाद । चित्त समाधि ऋद्धिपाद । विमर्श समाधि ऋद्धिपाद । थुजागु प्यंगू ऋद्धिपाद दु ।

१) छन्द समाधि ऋद्धिपाद- अनेक अनित्य वस्तु यको दयेमा धका धन, छें, बुं सम्पत्ति अपो दयेकेगु तृष्णा कया तृष्णा, भव तृष्णा, विभव तृष्णा कायेगु इच्छा यायेगु त्वतो उँकी लगे मजूस्ये ध्यान उत्पन्न जूगु

चित्ते समाधि एकाग्र जूगु स्थिर चित्त शक्ति योग साधना याना च्वनेगु यात धाइगु खः ।

२) वीर्य समाधि ऋद्धिपाद- थःम्हं वीर्य प्रकट याना तःसकं उत्साह यागु समाधि उत्पन्न जूगु चित्तं ध्याने च्वनेत उद्योग यायेगु स्थिर चित्त योग साधना याना च्वनेगु यात धाइगु खः ।

३) चित्त समाधि ऋद्धिपाद- चित्तया अन्तस्करणं बोधिचित्तोत्पाद याना दिव्यशक्ति योग याना च्वनेगु यात धाइगु खः । बोधिचित्त बोधिप्रणिधि चित्त, बोधिप्रस्थान चित्त साधना यायेगु खः ।

४) विमर्श समाधि ऋद्धिपाद- समालोचना, गुण, दोष व परीक्षा यागु मीमांसाया विचारपूर्वकं तत्त्व ज्ञानं निर्णय उत्पन्न जूगु समाधिस्थिर चित्त याना योग ध्यान याना च्वनेगु यात धाइगु खः । थ्वयात मीमांसा समाधि ऋद्धिपादनं धाइगु खः । थुजागु प्यंगू ऋद्धिपादय् भिंगु मभिंगु, शुभ अशुभ, प्रिय अप्रिय, राग द्वेष मोह सुख दुःख यागु भाव छुं नं मदुगु छुं कीसं मथ्यूगु शंका धइगु छुं नं मदुगु त्यागी जुया एकाग्र स्थिर चित्त समाधिद्वारा दिव्यशक्ति योग साधना याना च्वनेगु प्यंगू ऋद्धिपादया ज्ञानयात समाधि परिकर्म मार्ग ज्ञान धाइगु कनातःगु दु । थ्वहे सिलसिलाया नापं नामसंगीतिज्ञाने कनातःगुकथं पंचज्ञानेन्द्रिय व पंचकर्मेन्द्रिय निगू मिले जुया दशेन्द्रिय जुइ ।

पंचज्ञानेन्द्रिय-

चक्षु श्रोत्र तथा घ्राणः जिह्वा त्वक् च प्रज्ञेन्द्रियः ।

रूप शब्द तथा गन्धः रसः स्पर्श विनोदकः ॥

अर्थात् मिखा, न्हाय्पं, न्हाय्, म्ये, छ्यंगु थुलि न्यागू यात पंचज्ञानेन्द्रिय धाइगु खः । पंचज्ञानेन्द्रियया ल्यू ल्यू वइगु रूप, शब्द, गन्ध, रस, स्पर्श वया च्वनी । पंचज्ञानेन्द्रिय यात प्रज्ञेन्द्रिय नं धाइगु खः । पंचज्ञानेन्द्रिय यागु स्वभाव च्वय् कने धुन ।

मिखाया देवता चन्द्र सूर्य धयातल । मिखां खनिगु जः, सूर्य यागु तेज व मतयागु जः खः । कारण सूर्ययागु निभाजः व मतयागु जः मदयेकं

छुं नं खनिमखु । चान्हे पूर्णिमा कुन्हु चन्द्रमा खनिबलय् मिखां लें खना च्वनी । ख्यूंगु ईलय् वने बलय् मतं क्यना फुकं खना च्वनी । उकीं मिखाया देवता चन्द्र सूर्य व मत जुया च्वन । मत धइगु दीपराज देवता खः ।

न्हाय्पंया देवता दु । न्हाय्पंया देवता आकाश देवता जुयाच्वन । आकाशाय् शब्द वइगु ताय् दइगु । न्ह्यागु बाजं थाइगु ताय् दइगु न्हाय्पं नं ताइगु खः । फुक सः ताय् दइगु श्रोत्र देवता धाइगु खः । उकीं न्हाय्पंया देवतायात दिशा आकाश देवता धयातल । धर्मयागु बाखँ न्यंवनेगु धया तल । धर्मयागु बाखँ न्यंवनेगु ज्या बियातल । व श्रोत विज्ञान खः ।

न्हाय्पा देवता अश्विनी कुमार जुयाच्वन । अश्विनीकुमारं सुगन्ध नतुनेगु ज्या बियाच्वन । दुर्गन्ध वइगु यात त्याग याना च्वन । अजागु गन्ध विज्ञान बियातःगु दु ।

अथेहे म्येया देवता बरुण देवता जुयाच्वन । बरुण देवता धइम्ह बरुण नागराज लःया नायः जुया च्वन । उकीं म्यें लःवुया वइगु जुया म्येया देवतायात बरुण देवता धयातःगु खः । म्हुतु गना वनीबलय् लः त्वने प्यास लगे जुइ । लः त्वनी । मनयात आनन्द जुइ । रस सिइका कया मन आनन्द जुइका च्वनेगु रस विज्ञान खः ।

छूयंगुया देवता वायु देवता जुयाच्वन । वायु देवतां स्पर्श याइगु बखते क्वागु ख्वाउँगु सिइका काइगु ज्या बियाच्वन । उकीं वायुयात वायु धातु धाइगु खः । वायु धातु शरीरया अंग फुकेसनं व्यापक जुयाच्वन । वायु धातुयात त्वक विज्ञान धाइगु खः ।

थुपिं न्याम्ह ज्ञानेन्द्रिय देवतापिसं रूप खनीगु, गन्ध नतुनेगु, शब्द सः ताय् दइगु, रस सवाः काइगु । स्पर्श थिया स्वया क्वागु ख्वाउँगु सिइकेगु ज्या बियाच्वन । अजागु रूप, शब्द, गन्ध, रस स्पर्शया ज्या व्यूषि देवतापिन्त वंशे कायेगु बोधिचित्तयागु ज्या खः ।

नामसंगीतिज्ञानं बोधिचित्त बलवान जुया पंचज्ञानेन्द्रिय देवतापिस म्हायात बाँलाका श्रद्धा तया सम्मान याना च्वनीगु खः । अथे जूगुलि श्रद्धेन्द्रिय धयातल । थ्वयात प्रज्ञेन्द्रिय धाइगु खः ।

अनलि पंचकर्मेन्द्रिय दयाच्चंगु थुकथं कनातःगु दु ।

हस्तपादः मुखश्चैव पायूपस्थ कर्मेन्द्रियः ।

आहारे व्यवहारे च कर्मकाण्डे नियोजितः ।

अर्थात् ल्हा, तुति, म्हुतु, मलद्वार व लिंगद्वार थुलि न्यागू यात पंचकर्मेन्द्रिय धाइगु खः । पंचकर्मेन्द्रियया ज्या ल्हातं काइगु बीगु ज्या याइ । तुति गमन जुइगु । म्हुतुं नइगु, त्वनीगु । खगु, मखुगु खँ, काइगु । भिंगु बाखँ कनिगु । मलद्वारं मल त्याग याइगु । लिंगद्वारं मूत्र (पिशाब) याइगु जुयाच्चन ।

पंचकर्मेन्द्रियया देवतापिं दु । ल्हाया देवता इन्द्र देवता खः । इन्द्र देवतां शिल्प विद्या अनेक प्रकारया ज्या बियाच्चन ।

तुतिया देवता विष्णु देवता । विष्णु देवतां भिंगु ज्या याइपिन्त भिंगुलें गमन जुइका भिंगु आसन बियाच्चन ।

म्हुतुया देवता बागीश्वर देवता खः । बागीश्वर देवतां आख व्वनेगु ज्या बियाच्चन ।

मलद्वारया देवतां दुर्गन्ध मल फुक पिछ्वया च्वन । व' काल देवता खः ।

लिंगया देवता काम देवता जुयाच्चन । काम देवतां कामनन्दी कामस्नेह, काम छन्द लगे जुइगु मारकर्म याका च्वन । थजागु मार कर्म त्वता बीगु प्रज्ञेन्द्रिय ज्ञान लाभ यायेगु खः ।

थजागु पंचकर्मेन्द्रिय व पंचज्ञानेन्द्रिय निगू मिले जुया दशेन्द्रिय जुइ दशेन्द्रिय अध्यात्म व बहिर्धा इन्द्रिय विज्ञान दु ।

चव्य कनागु इन्द्रियया ज्या थ्ये चक्षुविज्ञान, श्रोतविज्ञान, घ्राणविज्ञान, जिह्वाविज्ञान व त्वकविज्ञान वइगु दु । थुकीया ल्यू ल्यू पंचकर्मेन्द्रिय आहार विहार प्रयोग याइगु स्वभाव बिया च्वनीगु जुयाच्चन ।

नामसंगीतिज्ञानं भिंगु आहार यायेगु, भिंगु विहार यायेगु चित्तयात ज्या बिया धर्म लुमंका ध्यान यायेगु नामसंगीति ध्यान धयातःगु दु ।

अकुशल कर्म मभिंगु ज्या त्वता बीगु उत्तम ज्या खः । बोधिचित्त

यागु ज्या उत्तम जुयाच्चनी । पंचज्ञानेन्द्रिय व पंचकर्मेन्द्रिय यात वार्धाचन वशे कया सम्बोधिज्ञान लाभ यायेगु पंचेन्द्रिय अथात् श्रद्धेन्द्रिय, वीर्येन्द्रिय, स्मृतीन्द्रिय, समाधीन्द्रिय, प्रज्ञेन्द्रिय कनातःगु दु । थजागु पंचेन्द्रियज्ञान लाभ यायेगु यात सम्बोधिपाक्षिक धर्मयागु लक्षण कनातःगु जुल ।

१) श्रद्धेन्द्रियं- लोकोत्तर निर्वाणया ज्ञानं विचारयाना च्वनेगुलि गुरुपिन्त कल्याण मित्रपिन्त श्रद्धातया भिंगु इच्छा प्रकट याना सम्यक्दृष्टि स्वयंगु । लोकोत्तर निर्वाण ज्ञान धायेबले संसारया व्यवहारे मच्चनेगु । सुगत मार्ग वनेगु खः । सुगत मार्ग धइगु नामसंगीतिज्ञान लाभ यायेगु खः ।

२) वीर्येन्द्रियं- कर्मयागु विपाक फल विचार याना स्वयंगुलि अग्रसर जुया भिंगुले न्ह्यचिला जुयेगु वीर्य प्रकट यायेगु खः । आलस्यत्वता अध्ययन याना महायान समन्वागत जुया बोधिसत्त्व चर्य शिक्षा कायेत अग्रसर जुइगु वीर्येन्द्रिय खः ।

३) स्मृतीन्द्रियं- कल्याण जूसा थजागु जुइ । प्रवृत्ति थजागु जुइ, निर्वृत्ति थजागु जुइ धइगु वाँलागु विचार याना ज्ञान सिइका लुमका च्वनेगु स्मृति बुद्धि धारणा याना च्वनेगु खः ।

४) समाधीन्द्रियं- सदानं ध्याने संलग्न जुया च्वनेगु ज्ञान सिइका चित्तं पिछ्वस्ये एकचित्तं जप तप ध्यान याना च्वनेगु खः । थःगु दशेन्द्रिय यात विजय याना इन्द्रिय जित जुइगु बुद्ध यागु ज्ञान धारणा याना च्वनेगु खः । इन्द्रिय जित जुये फसा जक बुद्ध जुये फइगु न्ह्योने वयाच्चनीगु जुल ।

५) प्रज्ञेन्द्रियं- समाधि यागु ज्ञान सिइका समाधीन्द्रिय एकाग्र चित्तयाना चित्तस्थिर जुइका ध्यान याना च्वनेगु कुतः याना सम्यक्सम्बोधिज्ञान लाभ याये फय्मा धका प्रणिधान याना च्वनेगु खः । "अनुत्तरायां सम्यक्सम्बोधौ प्रज्ञेन्द्रियं" धका वइगु ज्ञान सिइके माःगु जुल । अनुत्तर सम्यक्सम्बोधिज्ञान सिइकेगु प्रज्ञेन्द्रिय खः धयातःगु दु ।

थनंलि नामसंगीतिज्ञाने पंचबल धइगु न्यागू बल वइगु दु ।

श्रद्धावीर्य स्मृतिश्चैव समाधिज्ञान पूर्ववत् ।

इन्द्रियाणां शठवैरं जेतुं कर्मठ वै बलः ॥

श्रद्धाबल, वीर्यबल, स्मृतिबल, समाधिबल, ज्ञानबल वङ्गु दु ।

१) श्रद्धाबल- शठ स्वभाव अर्थात् बेइमानी जालसाजी याइगु स्वभाव जूपिन्त व पक्षपातं वैरभाव जुयाच्चपिन्त बुकेगु थः कर्मठ जुया श्रद्धाबल त्याकेगु बल दयेकेगु । नामसंगीतियात श्रद्धातया बुद्धधर्म बल्लाकेगु बल दयेकेगु खः ।

२) वीर्यबल- पराक्रमं शूरा जुया च्वनेगु ^{प्रीति}ज्ञानियागु बुद्धि दयेका वीर्यवान् जुइगु बल दयेकेगु । नामसंगीतियागु ज्ञाने वीर्यबल दयेकेगु ।

३) समाधिबल- समाधि व ध्यानया बल दयेका मार वोपिन्त परास्त यायेगु समाधिबल दयेकेगु । समाधिबल धइगु प्रथमध्यान, द्वितीयध्यान, तृतीयध्यान व चतुर्थध्यान थुलि प्यंगू ध्यानया बल दयेकेगु खः ।

४) ज्ञानबल- राग द्वेष मोहं याइगु अकुशल कर्मयात तापाका भावितेन्द्रियं विजय यायेगु ज्ञानबल दयेकेगु खः ।

५) स्मृतिबल- फुक कर्म यांना वःगुपूर्वानुस्मृतिज्ञानं लुमंका स्मृतिवान् जुया धर्मोपदेश बीगु बल दयेकेगु खः ।

थुलि न्यागू बल दयेकेगु यात तथागत बल धाइगु खः । धइगु नामसंगीतिज्ञाने कनातःगु दु ।

थनंलि नामसंगीतिज्ञाने च्वंगु सर्वज्ञान अधिष्ठान मार्गया सप्तत्रिंशत सम्बोध्यंगज्ञान न्हय्गु प्रकार वङ्गु दु ।

१) स्मृति सम्बोध्यंग । २) धर्म प्रविचय सम्बोध्यंग ।

३) वीर्य सम्बोध्यंग । ४) प्रीति सम्बोध्यंग ।

५) प्रश्रव्धि सम्बोध्यंग । ६) समाधि सम्बोध्यंग ।

७) उपेक्षा सम्बोध्यंग ।

१) स्मृति सम्बोध्यंग- च्वय् कनागु प्यंगू स्मृति उपस्थान यागु ज्ञान बाँलाक विचार यांना लुमंका संसारे अविद्यां यांना जुइगु अनित्य फुक सिइका स्मृति सम्प्रजन्य युक्तगु चित्तं ज्ञानबल लुमंका नामसंगीतिज्ञान धारणा यांना च्वनेगु खः ।

२) अर्म प्रविचय सम्बोध्यंग- संसारे अविद्यां यांना जूगु फुक अज्ञान याकें दुःख मजुइमा । प्राणीपिन्त सदानं सुख जुइमा धइगु प्रणिधान यांना भवचक्र यागु वन्धनं मुक्त जुया वनेगु लँपुइ गमन जुया च्वनेगु बुद्धधर्म उपाय कौशल्ययान यागु ज्ञान सिइका सत्कारपूर्वकं धर्मयागु सम्बोधिया अंग ज्ञान परिपक्व जुइका नामसंगीतिज्ञान यागु सम्बोध्यंगज्ञान धारण यांना च्वनेगु खः ।

३) वीर्य सम्बोध्यंग- सुख दुःख विचार मदयेक विपरीत ज्ञाने लगें जुइगु चित्तयात ज्ञानबल वीर्यबल प्रकट यांना चित्तवशे तयगु उपाय ज्ञान स्मृतिरुपी अंकुशं चित्तयात तक्कंका चित्त थःगु वशे तया उत्साह यांना बोधिचित्त यागु अंग धारणा यांना च्वनेगु खः । बोधिचित्त यागु अंग सिइका वीर्य बल्लाका पराक्रम दयेका च्वनेगु खः ।

४) प्रीति सम्बोध्यंग- सदानं सन्तोष जुया च्वनेगु । शीले च्वना बुद्धधर्म प्रतिस्थित यायेत हर्ष प्रफुल्ल जुइगु । सकल नाप प्रीति अनुभवं आनन्द जुइका च्वनेगु खः ।

५) प्रश्रद्धि सम्बोध्यंग- शान्त जुइगु शिक्षा आर्जन यांना पंचशीलय च्वना जप तप ध्यान यायेगु । व्रत च्वने बले थःगु शरीरय् न्ह्यागु दुःख जूवोसामं सहन शील दयेका मेपिसं बिना कारणं अपमान यागु सहयाना क्षान्ति धर्म धारण यायेगु नामसंगीतिज्ञाने च्वंगु क्षान्ति पारमिता बोधिया अंग सिइकेगु खः ।

६) समाधि सम्बोध्यंग- थ्व संसारे दुने पिने छुं नं दुगु मखु । हान अध्यात्म व बहिर्धा यागु कल्पना रचना यांना जूगु छु तक दु । व फुक अनित्य धका बोध जुया एकाग्र चित्तं नामसंगीतिज्ञाने च्वंगु समाधि धारणा यांना च्वनेगु खः ।

७) उपेक्षा सम्बोध्यंग- यावत् पशुपंछि प्राणीत गुलि दु । उपिं फुक प्राणीपिन्त थःथिति नाताया भावयाना मेपिसं थःत दुःख व्यूवोसानं क्षान्तिधर्मया सहनशीलय् च्वना थः पर धइगु पक्षपात मयासे मोक्षज्ञान मदुगु हीनयान यात त्याग यांना सर्वत्र उपेक्षा ज्ञान धारणा यांना च्वनेगु

नामसंगीति यागु ज्ञाने च्वंगु उपेक्षा ज्ञान धारणा याना च्वनेगु खः ।
बुद्धयागु ज्ञान परिपक्व जुइका सम्बोधिया अंग सिइका ज्ञान धारणा याना
च्वनेगु खः । सकल सत्त्व प्राणीपिन्त रक्षा याना च्वनेफय्मा धका प्रणिधान
याना सर्वत्र उपेक्षा सम्बोधियागु अंग ज्ञान धारणा याना च्वनेगु खः ।

थुलि न्हय्गु सम्बोधिया अंग सिइकेगु यात नामसंगीतिज्ञाने सर्वज्ञता
मार्ग व अधिष्ठान मार्ग धाइगु खः । तथागतयागु बल काय लोभ जुइगु व
निर्वाणाश्रय स्वभाव प्राप्त जुइगु नं खः । हानं थःगु शरीरय् बोधिचित्त
धर्मधातु बलवान जुयाच्वनीगु नं खः । नामसंगीतिज्ञाने थुजागु न्हय्गू
सम्बोध्यंग ज्ञान भगवान बुद्धं कना बिज्यागु बोधिज्ञानया अंग धयातःगु दु ।

अनंलि नामसंगीतिज्ञाने आर्यअष्टांगमार्ग थुकथं कनातःगु दु ।
आर्यअष्टांगमार्ग च्यागू प्रकार दु ।

- | | |
|-------------------|---------------------|
| १) सम्यक्दृष्टि । | २) सम्यक्संकल्प । |
| ३) सम्यक्वाक । | ४) सम्यक्कर्मन्ति । |
| ५) सम्यक्आजीव । | ६) सम्यक्व्यायाम । |
| ७) सम्यक्स्मृति । | ८) सम्यक्समाधि । |

१) सम्यक्दृष्टि- सम्पूर्णप्राणीपिन्त सुख जुइगु व सुख जूगु, स्वय्
दयेमा । धका सदानं लुमंका च्वनेगु । अथेहे बुद्धयागु ज्ञान लाभ यायेगु
प्रणिधान याना प्यंगू स्मृत्युपस्थानं निसें न्हय्गू सम्बोध्यंग ज्ञान लुमंका
च्वनेगु यात नामसंगीति सम्यक्दृष्टि धाइगु खः ।

२) सम्यक्संकल्प- प्राणीपिन्तसदानं कल्याण जुइमा । कल्याण जूगु
स्वय् दयेमा धका संकल्प याना च्वनेगु खः । थुलि सम्यक्दृष्टि व
सम्यक्संकल्पयात प्रज्ञाज्ञान धाइगु खः ।

३) सम्यक्वाक- अनर्थगु असत्य वचन ल्हाय्गु त्वता यथार्थ सत्य
वचन तया जुइगु । सत्य वचनं नम्र भाव जुया मैत्री करुणा तया
च्वनेगु । सम्यक्वाकया नियम खः ।

४) सम्यक्कर्मन्ति- न्हिथं शुद्धगु कर्मयाना च्वनेगु । न्ह्यागु पूजा
यायेबलय् मद्यपान त्वतेगु, ज्या मछिना च्वपिन्त उपकार जुइगु ज्यायाना
व्यनेगु । सम्यक्कर्मन्ति खः ।

५)।सम्यक्आजीव- सदानं भिंगु शुद्धगु ज्या क्यना धर्म यांना चवनेगु । सकल नाप मित्रभाव यांना जीविका चले यांना चवनेगु बुद्धधर्मे सकलयात समानता यांना क्यनेगु खः । सम्यक्वाक, सम्यक्कमान्त, सम्यक्आजीव थुलि स्वंगू ज्ञाने चवनेगु यात शील धाइगु खः । शान्त पारमिता पूर्ण यायेगु नं खः ।

६) सम्यक्व्यायाम- सदानं प्राणीपिन्त उपकार जुइगु उद्योग परिश्रम यांना चवनेगु । ध्यान यायेत तत्पर जुया चवनेगु । समाधियोगे चवनेत परिश्रम यायेगु-बल दयेकेगु खः । सदानं धर्मे परिश्रम यांना मार वोसान सह यांना चवनेगु खः ।

७) सम्यक्स्मृति- सदानं भिंगु ज्ञान लुमंका बोधिज्ञान लुमंका चवनेगु । बुद्धधर्म यागु ज्ञान लुमंका स्मृतिवान जुया चवनेगु खः । पूर्वानुस्मृतिज्ञान लुमना वइगु स्वयंगु खः ।

८) सम्यक्समाधि- सदानं चित्त स्थिर जुइका योग ध्यान जप तप समाधि योग यांना निश्चल जुया चवनेगु खः । थ्व नामसंगीति यागु समाधि खः । थुजागु समाधिं सकल प्राणीपिन्त हित सुख जुइगु करुणा संयुक्त यांना प्रज्ञाशील समाधि ज्ञानं संसारं तरे जुइगु निर्वाणमार्ग खः । नामसंगीतिज्ञाने थुजागु अष्टांगमार्ग क्यनातःगु दु ।

नामसंगीतिज्ञाने च्वंगु सप्तत्रिंशत सम्बोधिपाक्षिक धर्म अंगिकार यांना चवनेगु बोधिज्ञानया अंग खः । धइगु नामसंगीतिज्ञान भगवान बुद्ध कना बिज्याना वनं ।

थुजागु बुद्धोपदेश पूर्वकाले दीपंकर भगवान बुद्धं महायान धर्म कना बिज्यागु आपालं पुलांगु जुया च्वंगु दु । थुजागु पुलांगु महायान धर्म अध्ययन यायेगु फुर्सत मदु, स्वयंगु इच्छा मदु धयाच्वन धाःसा अजापिं च्यागू अक्षणदोषे लावनी । च्यागू अक्षण दोषं लिप्त जुया संसार यागु खुगू गति भोग यावनिपिं जुल ।

खुगू गति धइगु देवगति, दैत्यगति, नरकगति, पशुगति, पंछिगति, प्रेतगतिंयात धाइगु खः । थुजागु च्यागू अक्षण दोषे लापिं मनूत खुगू गति स्वयम् कर्म भोग यांना चवनीगु जुल ।

देवगति धइगु मारकायिक देवभुवने च्वंपिन्त धाइगु खः । अन
देवगति लापिनं मोहे भुले जुया धर्म यायेगु फुर्सत मद्दु । अजापिं देवगति
नातुं वना भोग याना च्वनी ।

तिर्यकगति, पंछिगति, पशुगति, प्रेतगति, म्लेच्छगति लापिनं धर्म
यायेगु पुर्सत मद्दु । अजापिं अजागुहे गति वना दुःख भोग याना जुइपिं
जुल ।

अनंलि न्हय्गू अन्तराभव धइगु नरकभव, तिर्यकभव, प्रेतभव,
देवभव, मनुष्यभव, कर्मभव व अन्तराभव धइगु दु । थुलि न्हय्गू अन्तरभवे
लाइवले प्यंगू योनि उत्पन्न जूवनी ।

प्यंगू योनि धइगु अण्डज – खेंचं उत्पन्न जुइगु ।

जरायुज धइगु – पिघाना जन्म जुइगु ।

स्वेदज धइगु चःति दुर्गन्धगु स्थाने उत्पन्न जुइगु । ।

उपपादुक धइगु वनस्पति थ्यें स्वयं उत्पन्न जूवनीगु जन्म मरणे
चाहुला च्वनीगु जुयाच्वन ।

उकिया कारणे थजागु दुःख जुइगु जन्मभवसागरे मलाकेत भगवान
बुद्ध नामसंगीतिज्ञान सप्तत्रिंशत सम्बोधिपाक्षिक धर्म कना बिज्याना वंगु
अध्ययन याना बोधिसत्त्व चर्य याना वनेगु कुतः याना च्वनेमाःगु जुल ।

नामसंगीति नाममन्त्रार्थ अवलोकिनीया भावार्थे १० अध्याये कना
तःगु सप्तत्रिंशत सम्बोधिपाक्षिक धर्मया ज्ञान क्वचाल ।

ये धर्मा हेतु प्रभवा हेतु स्तेषां तथागतो ह्यवदत्

तेषां च यो निरोध एवं वादी महा श्रमणः ॥

। शुभम् ।



स्व. चिरीकाजी शाक्य

जन्म - १९०८ - १०/०८/१९०८
मृत्यु - १९८८ - १०/०८/१९८८



स्व. जोगमाया शाक्य

जन्म - १९०८ - १०/०८/१९०८
मृत्यु - १९८८ - १०/०८/१९८८

सुगति कामना

विवर्गत जुधा बिज्यापि पूजनीय पिता चिरीकाजी
शाक्य च पूजनीय ममतामयी माता जोगमाया शाक्य पितृगु
सुखावती भवनस वास लायमा धका कामना याना च्वना ।

सुजति कामना साप्ति

साप्ति

१. जगन्नाथ शाक्य
२. चन्द्रमणि शाक्य
३. मंगलमणि शाक्य

साप्ति

४. लक्ष्मी शाक्य
५. रत्नमणि शाक्य
६. विमलेश शाक्य

साप्ति

पुणमाया शाक्य

छापि

राजेश शाक्य
महेश शाक्य
मंगल शाक्य

निर्मला शाक्य
चन्द्रलक्ष्मी शाक्य
अन्जु शाक्य
सरिता शाक्य

हृन्दिश शाक्य
मन्दिश शाक्य
आम्बा शाक्य
गुप्ता शाक्य

काय - १९८८ - १०/०८/१९८८